



## AU TINS DES CONDJIS

(...)

Dji m’ ècoradjève, dji fiève tot po m’ ènonder èt m’ traîtî d’ tos lès noms di nén wazu ièsse pus franc èt d’ awè todi rimètu au lèdmwin. Lès condjîs tirîne dsus leû fén kan dji m’a dècidé. Dj’a rmonté è corant tote li voye do Roû po rdjonde, oute do cimintîr, li pachi èwouski l’ Filo riwêtéve auzès cénk-chîj gades di s’ marèn.ne. Muchîye pa-dzos on vî chambèrlin ki l’ tinéve à iute do solia odobén dès plouves d’ awousse, èle tèchéve dès tchaussètes di grîje lin.ne. Come tofêr, sès nwârs tchivias, fén frêches télmint i fiève loûrd, lî muchîne sès ouy èt tchère djusk’a l’ craye di s’ bleuwe bloûze. Kan èle si savéve mërseule èle rinêrichéve insi s’ pwètrène dèdja bèn fwate po ène si djonne bauchèle. Èle a stî sîbarêye di m’ voye don lan m’ ascropu à costé d’ lêye èt, tot rodje, lî dire bondjoû.

- Waîtoz à vos, m’ a-t-èle dit, m’ frére n’ èst nén lon èri à soyî lès foûrs.
- Filo, Filo, lî a-dj’ tchafiyî, dji n’ a nén peû d’ vosse frére. I m’ faut cauzer avou vos. Dj’a l’ tins lon d’ vos dire ki dji vos trove à m’ goût avou vos bias ouy coleûr di l’ aur.

A dire li vrai, sès ouy tirîne pus rade dsus on fâde djane k’ a stî distindû pau solia. I m’ faléve kan min.me sayî d’ lî fé on ptit compliment.

Faut crwêre k’on n’ lî è fiève nén sovént pace k’ èle a sorî èt m’ lèyî m’ bèn astoker. Come èle n’ avéve nén l’air d’ ièsse à l’ après d’ ça, dji m’ a dit k’il momint èstéve vinu èt d’ sayî dèl rabrèssî. M’ brès lî a passé ddri s’ n’ anète. Èle ni m’ a nén riwêfî d’

crèsse, si bèn ki m’ mwin a dischindu èt d’ aler s’ broker dins l’ tchafôr d’ si dzos d’ brès. Ridant dins s’ suweu, l’ bètchète di mès dwèts s’ ont stichî sins tchikner èt djonde l’ èdaume dèl rondeû di s’ pwètrène. Adon èle s’ a rwèdi ène miète èt sèrer s’ couûde po m’ èspêchî d’ aler pus lon.

Dji m’a sintu tot bièsse. M’ faléve-t-i don djusse lî fé dès compliments ? Dj’ avéve dèdja tro pièrdû d’ tins. Dji lî a apicî sès tchvias èt lî ployî s’ tièsse au rvièr d’on sètch còp. M’ botche a rade sipotchî l’ “Ouye-ti” k’ èwarêye èle comincéve à bwêrler. Volà, dj’ avéve coudu c’ki dj’ avéve si lontins ratindû !

– Vos m’ vèyoze don voltîye ? m’a-t-èle dit ?

L’ vîre voltîye ? mi ? Ké idêye ! Dji m’a rastinu d’ richoûrbu mès lèbes èt lî dmander tot m’ riculant on pô :

- N’ èstèz don nén mwêje après mi ?
- Kan minme ène miète, k’ èle m’a rèspondu avou on sorîre.

Insi rècoradjî, dji m’a rlançî à l’ bètchî di totes mès fwaces èt c’ còp-ci sins k’ èle fèye chénance di n’ nén m’ lèyî lî bèn apougî s’ gôche tête... ki dj’ a trové fwart mole pa-dzos d’ mès dwèts. Dj’a rade sintu s’ mamuron s’ radeûri èt èle s’a mètu à blèfer ène miète di tro a m’ goût. Seûr k’èle avéve roviyî ki s’ frére n’ èstéve nén lon èri; mi dji l’ a ètindû s’ ramwinrner. I tchantéve “Vént poupouye.” Po c’ djoû-la i m’ faléve djoker cès plèjants ptits tripotâdjès. Filo a sospiré kan dji lî a chouflé à l’ oraye k’ po mi l’ tins d’ èraler èstéve la.

– A pu taurd, lî a-dj’ dit, pinsèz à mi. Sins pont d’ brût, dj’a pèté èvoye, tot fir di mi, au truvéi dès bouchnisses. Dsus m’ linwe dji sintéve on

**On saye di continuer à tot comachî...**

drole di seûr goût. Vinêve-t-èle di suçi do djudjube ?

Dj’a ratindu l’ dimègne, èt ièsse sûr k’ èle s’avêve richuré è s’ bassine, po l’ rivoye. C’ n’èst nén k’ l’odeûr di s’ suweu m’ avêve disrindjî, dji n’ èstêve nén à l’ après d’ ça, mins, après tot, k’ èle fuche bén rinètîye a l’ brouche èt l’ savonète di Marsèye n’ èstêve nén po m’ disgoster n’è rén.

Po rivnu dès vèpes, èle duvéve passer pa l’ ruwalète ki londje l’ fond do corti di m’matante. Dji lî a ratindu èt l’ fé passer pau trau d’ l’ aye. Èle n’a pont fé d’manîre po m’ chûre à bachète èt intrer dins l’ gloriète, bén au rcwèt ddrî lès wôts gruzèlîs èt lès grandès fouyes di rubâbe. Dj’ avêve tot arindjî èt î stinde ène vîye covêrte, ki trinnêve dins li stauve, dsus on moncia d’ sètch foûr bén stauré.

Filo s’ î a mètu èt bén sèrer s’ rodje bèle cote do dimègne pa-dzos lèye. Polêve-t-èle mi rfuzer c’k’èle m’avêve dèdja doné ? Nonna, ènn’don ! On s’a don mètu à s’ bètchî on p’tit momint... ki m’a chéné bén lon. I m’falêve tot minme prinde li tins di rascoude lès intèrêts di m’ placemint dvant d’ èdaumer l’ capital. Èle si lèyéve fé èt dimèrer moyate. I n’ duvéve i awè k’ wêre di cayèts à lî èburtaker s’ tièsse. Falêve l’ètinde sospirer à ikèts kan dji lî bètchéve èt lî carèssî s’ pwètrène. Èle duvéve ièsse en manke d’ ayèssâdjes. Mins, l’ tins

passéve èt l’ momint d’ soper alêve bén rade ièsse la. I m’ falêve don côper au coût èt m’ dovièt l’ apêtit. M’ mwin a conté lès ouchas d’ si skine, lî rifter s’ cwisse, si stitchî pa-dzos s’ cote èt rmonter pigote à migote po djonde si laudje culote di pilou.

– C’èst don ça k’ vos volèz asteûre ?

Èle s’ a bén cotapé ène pitite dimêye eûre èt dîre “nonna, nonna” mins èle n’ èstêve nén prèsse à s’ è raler. Si bén ki dja fini pa côude l’ frût ki m’ fiève glèter l’ Popol dispû dès samwinnes... mins l’ djardén avêve dèdja sfî trèvautchî. Filo n’ a nén sayî d’ m’ è fé acrwêre, èle s’ a continté d’ bén

arindjî sès mousemints po n’ lès nén racafougnîs èt sèrer sès ouy dsus l’ plêji k’ èle m’ a chéné prinde. Po mi, k’ avêve si tant taurdu à trover l’ clitche po druviè ène uch dispû lontins au laudje, ça s’a passé si rade ki dji n’ m’a rindu conte di rén. L’ affaire faite, dji n’ mi sintêve nén soladjî po çoula.

- Astéz rafiyî, asteure ? m’a-t-èle dimandé tot disfrochant s’ cote èt fé tchère lès fistus ki s’î avîne aclapés.

Kwè lî polêve-dj’ rèsponde ? Djî lî a dné raploû po li lèdmwin èt, tot rmontant mès burtèles, dj’ a rintré a dadaye è m’ maujone.

L’ èsté fini, on n’s’avêve ritrové k’on fayé côp au rcwèt dès bouchnisses. Èle n’avêve pus rind po m’atirer.

Pus taurd, dj’ a ètindu k’èle avêve sitî frékentêye pa l’ fi da Miyin l’ monî. I z-ont fini pa s’ mète è mwinnadje. Èle lî a dné cénk valèts èt trwès crapaudes. Parètrêve k’ asteure èle èst tote seûle èt dwèt pèsèr dins lès cint-trinte kulos, minme ki dj’i l’ arêve crwèzé l’ ôtrayîr sins l’ rimète...

*(Avèz ritrové sakantès rixhonances avou on conxhu sicrijhaedje ? Est-ce volu, l’ couleur meteuwe a paurt ? Aloz sawè ! Mins, kî est ce ki ça poreve bén esse et ewou ?)*



**On saye di continuer à tot comachî...**